

ARCHIVI

de leterature furlane antighe e moderne

*Biele lenghe furlane fortunade!
cumò sarà di te pûr fate stime
e plui d'ogn'altre tu saràs loldade.*

GASPAR CARABÈL (Rumîd
cirche 1630)

Cheste dispense 'e contèn :

Guidon Salvadi (Guido Podreche) - LA STRIE
pa'i ans 1894 e 1895 ed altris
poesiis furlanis.

Costantin Smaniotto - TITUTE LALELE
comèdie in 3 aç. (cont. e fin)

Cont Tite Puarte — IL PÊT A GURIÇE
poemèt in cinch ciânc.

Comènt di dôs poesiis di Zorût.

Taule dople cu-l ritrâc di: Blasòn, òsterman,
Scaramuçe, Clampane, Valzách, Toni e
Leon Recardín e Fracanape.

Cu-la publicaçion de seste dispense il letôr nò-l pò plui dubità che l' **Archivi** nò-l vebi di vivi. Viarzin quindi un abonamènt a 10 dispensis al presi di 12.50 franchs par l'interno e di 15 par l'èstero. L'impuart si pò spedì cun mínime spese su-l **Cont corint postâl N. 8 - 69 Udin, plaçe Vitòrio Em. 9 A.** Indicâ da quale dispense si intind sei abonâc.

I abonâc dirèc e' gioldarán ches-e vantâc:

1) Di ricevi al presi di cost cuviartine, frontespîci e indiç par leâ il volûm;
2) Di podè ritirâ la dispense o lis dispensis riservadis tiradis in limitatissim numar di còpiis par i studiôs, che contegnarân i branos di caratar masse libar;

3) Di ricevi al stess presit ancje lis dispensis che varân, in sfueis separâc e in ciarte patinade, i ritrâc dai benemerîc de lenghe furlane. Lis ilustraçions sarân nome pa-i abonâc.

Dopo finide la publicaçion des poesiis di Podreche, si scomençarân a dà fûr des ôparis di un o l'altri fra ches-e tre autôrs in gran part inediç: **Eusebi Stele** di Spilimberg, **Florendo Mariuçe** di Clamfuarmid, **Cont Tite Puarte** di Udin. La sètme dispense varâ vot ritrâc.

Si ricuarde che i Rivenditôrs e' han l'obligh morâl di rimandâ in bon stât lis còpiis non vindudis e di pajâ chês che nò tornin indaûr, sençe bisugne di sei sbordonâc.

Par un ceno su-la vite e su-lis ôpari di **Greât, Comèl, Cossâr, Leilemburg, Nascim-bèn** ecet. fasîn assegnamènt su-la colaboraçion dei abonâc.

Cheste seconde táule dople si distribuisc ancje ai non abonâc.

Stabilimènt Tipo-Litografich **BEPO TABÀCH** — Sandenêl dal Friûl

Dispense imprestade, jê dispense piardude o almanco uastade

TITUTE LALELE - Comédie in 3 aç di C. SMANIOTTO

(Continuaçion dal tîerç at, e fin)

- TITUTE — (*nò-l sa ce fâ*) (*sôl*) 'O vorèss vè-le ca denánt di me in zenoglòn.
PRE NOÇÈNT — Pace, pace.
TITUTE — Mi toçe sedi.... Indulá is-e 'to mari?
ESTERINE — (*clamánd, contente*) Mariute, Mariute, va, clame la parone.
PRE NOÇÈNT — La parone 'e sará ca a momènc; 'e jé lade fin al camiòn a viodi se il stampadôr al-ha mandât lis últimis partecipaçions.
Anzit 'o larai iò a clamâ-le; za che le hai scomençade, 'o vuei finî-le cheste òpare di ben (*al va vie*).
VENÂNÇIO — Brao pre Nocente, el la menì quâ a la svelta.
TITUTE — (*a Esterine*) Dut par te, sas-tu, dut par te.
VENÂNÇIO — (*vicin a Esterine a Titute*) Sestu contenta adesso?
ESTERINE — Tanto. Grazie al mio paparuti e anca a ti.
TITUTE — 'O scomençarai intánt cu-l bussâti te (*la busse*).

SCENE QUARTE

(*Mariute 'e anünçie siôr Mòmololo*)

- MARIUTE — (*su la puarte*) Al'è ca siôr Mòmololo.
TITUTE — Can da l'òstrighe al'è un comediánt chel mostro.
VENÂNÇIO — Un bon zovine però.
TITUTE — J hai perdonât apene ir e za al si ris-ce a vigni ca.
MÒMOLO — (*al si presente timid e fasind une riverenze*) Rimetto pie' nella sua casa grazie al so perdon. Signori riveriti.
TITUTE — Cio', Mòmololo, nò jé la prime volte che tu mi fasis cussì, e po' tu voltis bandiere.
MÒMOLO — Un povero segretario, come galo de contignirse in certe circostanze? Ma le xe tute aparenze, el mal el passa ma el ben el resterà sempre. I me diga loro come che un misero mortal, che el ga bisogno de ciaparse el pan, el podarà far diversamente.
TITUTE — Tu sês une blavate.
VENÂNÇIO — Ciò veramente no se pol farghe torto. Mòmololo el se prestarà per render lieta la nostra festa co la so vose amabile. - El canterà per la prima volta la più bella composizion che mi gabia fato. - Parole e musica mie de mi, tute de mi e dedicate alla mia, che ormai se pol dir, sposeta gentil.
ESTERINE — Che gentil!
VENÂNÇIO — Semio a posto?
MÒMOLO — In gamba; xe tre noti che la studio.
TITUTE — Sintin-le, corpo da l'ue, in *camera caritatis*.
MÒMOLO — A dir la verità senza accompagnamento.....
VENÂNÇIO — Ste attenti; a Mòmololo ghe ocore gâs, lo capisso, ma a mi che la go scritta..... ste attenti.....

(*Al ciente esageránt tant perâulis che músiche*)

Cara, soave e' tepida
Come la tortorella
Con quel oceto languido
Ella si fa più bella
Con quel bocchin de suchero
Col mesto sospirar
Ah! il ciel l'ha fatta nascere
Perchè la debba amar.

TITUTE — (*duc a' batin lis mans*) Lo baso co le lagrime tei oci.

MÔMOLO — (*presentând un manoscrit*) Ai sposi veci e zoveni, questi sonetti dedico. El xe un volume de 24 sonetti in egual numero de ani scrîto, e dedicà par loro.

TITUTE — Chest al dimostre el to atacamènt par nò-altris. Brao e gràcie par duc. 'Us visi però che áncie iò 'o hai vude une manie pe' poesie. 'O savarès che prime di sposà-mi, cioè di spasimà par Lúcie, 'o spasimavi pe' massàrie dal Nodâr Gurín di Mussèd e une sere d'avòst, dopo jessi stât cu-la frutate un fregul di plui di chel ch'al bisugnave, pa'i rivai dal Cormôr a contà lis stelis, mi visi di vè-i-gi dite: (*ciantând*)

Al ciante il giâl

Al criche il dí

O Miutine - alín a durmì.

MÔMOLO — Bela per dina. Complimenti, sior Podestá (*j dá la man*).

VENÂNCIO — Se'l gavesse continuà, chissà dove che - l saria andà a finirla - Pecà...
Cossa distu, Esterina?

ESTERINE — Ghe xe qualcosa de mèio per mi in questi giorni.

VENÂNCIO — (*cun confidence*) El to maridin, no xelo vero?

ESTERINE — (*sintâç sul sofâ un tacât a l'altri*) Si caro.

SCENE QUINTE

(*Pre Noçènt si presente a la puarte. Titute j còr incuintri*)

MÔMOLO — Pre Nozzente!

TITUTE — E Lússie is-e ca áncie je?

PLE NOÇÈNT — Eh, caro sior Tita, el cîl al tente di in-nuvolâ-si ancemò un'altre volte.

TITUTE — Nò-l'è pussibil.

PRE NOÇÈNT — La so siora 'e ha riçevût une lètare, nò sai po' se direte a je o a lui, propit quând ch' 'o stevi par menâ-le ca, le ha viarte...

TITUTE — Ma nò-le han-o finide ancemò, lis sioris dal Friûl di tormentâ-mi?

PRE NOÇÈNT — Mal... çe ch'al foss scrit nò puès savê-lu, ciárt al'è, che 'l devi sei alch di gruèss.

TITUTE — Nò-l puès jessi nuje cuintri di me (*in chel Lúcie 'e jentre in scene*)
Nò is-e vere Lúcie?

LÚCIE — (*fûr di sè di rábie*) Ah Lúcie sí? nò lu varèss mai crodût.

VENÂNCIO — Pace, pace siora Luzia, pace decretata.

TITUTE — 'O ti perdoni Lúcie devânt di duc (*al fâs par lâ-j incuintri ma je lu respînz*).

LÚCIE — In-daûr, che sarèss masse còmude par te..., in-daûr, figure porche.

TITUTE — (*sôl*) Márcie in-daûr (*al si grate la coçe*).

VENÂNCIO — Cossa xelo de novo, cossa xelo??

LÚCIE — (*continuánt*) E me tratâ-mi come une di poch di bon dome parcè mi 'vevi fat tajâ i ciavei, parcè ch' 'o hai volût visti-mi un fregul manco mâl? - Figure porche! (*E torne a lei par so cont la lètare mostran-si un-mònd gniarvose, intânt che i aitrîs e' stan zitos par sintî la conclusiòn. Titute al si sente e nò-l'ha fuarçe di fevelâ*).

VENÂNCIO — (*a Pre Noçent*) Cossa xelo, mi digo, che mistero?

PRE NOÇENT — Iò nò capisc plui nuje, 'o tornin di gnûf in alto mâr.

ESTERINE — Pò ce is-al, mame?

MÒMOLO — Se son de più... (*Lúcie 'e ha finît di tornâ a léi*).

LÚCIE — Restait duc ca, e, da leture di cheste lètare 'o capirès ce ch'al-è chel bon sòcio là. - Un vèr scandul e iò mi ciaparei la rivinçite par dut el timp che chel brigánt al mi à stuçigade (*e continue*).

TITUTE — (*anichilît su la ciadree*) Adio Podestarie.

LÚCIE — (*continuánt*) E' han vût cûr di nomenâ-lu podestât!

TITUTE — (*saltânt sú*) O ben po', fûr che vegni, nò sarâ mai tant gruesse di che che tu mi hâs cumbinât a Vignésie.

LÚCIE - A Vignésie? macaco, e' son rosis e flòrs. Al'è restât intât l'onôr de famee. Ma ca (*e bat la lètare fra lis mans*). Ah! se la vess tra lis grifis la turclarèss, chê maladète.

PRE NOÇENT — (*inframetin-si*) Anîn, anîn, ca di sicûr si esàgere.

TITUTE — (*sôl*) Cui sa ce che mi colará pe' cope, cumò.

ESTERINE — (*vainî*) No stâ fâ scândui, mame, ti prei.

VENÂNCIO — Andemo, per amor de so fia. E dir che la spetavimo per essere del tutto felissi.

LÚCIE — A lui pre Noçent (*e consegue la lètare*). E ch'al scusi se par colpe di chel pôch di bon, di chel prediciadôr di morâl, la so òpare di amí e di pâs 'e va in fum.

TITUTE — (*al colm de desperaçiòn*) (*Pre Noçent al lei par sè*)

Fûr, fûr che vegni, che sclopi la bombe e za che sin in bal, balín. - La roe 'e jé simpri lá che còr. - Iò 'o hai la cuscience nete. Fuárt, pre Noçent, fuárt che duc e' sintin. (*Duc e' van intôr di Titute che quasi al ciâd in deliqui. Mòmolò al çerce di calmâ Lúcie. Pre Noçent al torne a pleâ la lètare e al mene il ciâf par mostrâ che l'è malcontent*).

TITUTE - Altro che mulimènt... une piere di mulin 'e j ûl.

LÚCIE — E alore pre Noçent çe j pâr-ial?

SCENA SESTA

(*La comari jentre in presse in scene*)

COMARI (*contente*) Con-parmesso! 'O soi rivade in ritârd, che scusin.

Chêi de Bâncie e' proviodin golarinis
di gnûv model: E' spietin lis triestinis.

Per clamâ furistîrs a Çividât
il Municipi, dopo 'vê studiât,
el'ha scuviart il mûd — e nò-l'è ciâr —
di fâ gioldi ai forès-c i bains di mâr.
Cussì e' han fat vigni qualchi vagòn
di sâl, e lu han butât 'ta-l Nadisòn.

Setembar

Il timp l'è bièl, — l'aier quiet,
il çil l'è net — a-tôr a-tôr.
...Ciante il sfranzèl — sore un bachèt...
El-è un archèt — di oseladôr.
Come l'uçièl — l'omp ciante e rid
simpri cu-l pîd — de muart su-l'ôr.

Fin che si è zovins — Balín! Balín
Quând che si è vècios — Balón! Balón!

Autûn

Lis corsis a Çividât

Cumò che han mitûd sù il *Veloce Club*
fra i galandîns plui *scîchs* di Çividât
'o podîn, come a Udin, fâ lis corsis
e plui bièlis e plui a bon merciât.

Nò fâs par di, ma une gloriose stòrie
a Çividât l'ha chist divertimént;
baste di che des corsis plui famosis
'o hai vût l'onôr di sedî pressidént.

Mi visî propri come foss cu-mò
'e si veve mitûd un cartelón
“*Corse internazionali di bicicli*”
che l'incèave la popolaçion.

Erin vignûc da Udin, da Glémone,
da Vignésie, da Bris-cis, da Trièst,
da Vienne e da Pasiân, tanc forestîrs
che nò-l'ere plui mûd di ciatâ puèst.

Erin vignûc i *gentlemens* di Udin,
e i bookmakers cun tant di canociâl,
duc-quânc curiôs e seneôs di assisti
al gran spetacul intenaçionâl.

Si fasevin scomessis su-i plui brâs,
e si si pontave al totalizadôr,
e si conte parsin che un siôr di Clenje
el'ha piardût mièç franch... 't'un pissador.

Sin dal misdi, dúngie il marciât dai
(bûs,
el'ere plen il palch de pressidence,
e la fole ingrumade jù pe' strade,
'e scomençave a piardi la paciençe.

Passe miez'ore, un'ore, dôs, tre oris
e nò si viòd cariolis, né caretis,
quând che a la fin, apène capitadis,
e' si metin in rie dôs bicicletis.

Une 'e jere restade sençe gome,
ma del rest 'e varèss podût là ben;
l'altre 'e jere di fàbriche famose,
dute gnove.... peciât che foss di len.

lò ciapi il campanèl. I frutaçâç
si rampinin su-l palch par viodi miôr;
il palch al sclope, e duc de comission
si sdrumin 't-un fossâl cun pôch onôr.

Intânt un dei campions si met in viâç,
ma l'altri nò-l rièsce a montâ sù:
salte ca, salte là, quând che 'l pareve
che'l foss a puèst... el va cu-l ciav in jù.

Intânt il prin al leve vie di corse
pe' strade di Geân, tra i batimâns,
e tra tant entusiasmo, che j coreve
une sdrume daûr di sièt-vot ciâns.

La int 'e veve gran curiosità
di viodi il vinçitôr tornâ in-daûr
a cioli il premi; e spiete che ti spiete,
nò-l capitave... e intânt vignive scûr.

Da alore, e' son sis ains e plui passâç,
nò si ha savût dulà che 'l sedî làt;
sigûr che cun ché anade e cun chéi ciâns
nò-l'è tornât mai plui a Çividât.

Intânt il *popolaccio* si inrabie;
al sburte, al sbande, al romp ogni cordòn,
e come se nò vessin vût la colpe,
al si met a fis-ciâ la Comission.

Sivii, urloç bestemis, sacrabólç,
e mancûl mâl, fòssin-o sòl fis-ciadis:

Il piês el'è che al palch de Comission
scomençin a rivâ dos-tre clapadis.

Ol-che-ti-trai, mistir! Çe brut afâr!
La Comission, che brute si la sint,
'e lasce lis medais e il campanèl
e vie di corse jú par borg di Puînt.

E la canae daûr a siviladis
cun patacis, carôtulis e scuse,
di mûd che si ha capît che a Çividât
'e si po' dome fâ corsis di muss.

Oh çe timpât che 'vin!
Son doi dîs che su-l'ue plûv a cialdirs,
nò ocorerâ ai ustîrs
di studiâ tant a meti aghe ta-l vin.

Otubar

Il çil el'è tornât a serenâ
mancul mâl: scomençin a vendemâ.

Par tigni sù lis glôriis çitadinis
varin òpere e bal: e za si spietin
doi vagóns di ciantânç e balerinis.

Il plevân, par mâl che vadi,
el'há plen il foledôr:
Nò ven mai la peronòspore
in-t-é *Vigne del Signôr*?

'O hai zirât il mond ma nò hai ciatâç,
in nissûn lûch birbánç, come ca a Rome,
che 'vin i senatòrs e i deputâç.

Novembar

Soi stât 'ta-l Çimiteri il dí dei muârç
âncie in chel lûch di pâs e di pietât,
contemplând i sepolcris di tanc muârç,
la justicie del mond 'o hai studiât.

Ca par un siôr, un usurâr famôs,
une tombe di rosis contornade;
là, par un bon pîtòc, dome une crôs
di len frujât e mieze s-ciaveçade!

Chiste volte la **Strie** sigûr nò fale:
L'è San Martin, e a Çividât si bale.

E' clamin chest *l'Islât di S. Martin*
forsi pa-l frêd, pe' ploje e pa-l garbîn:
Alore *Luj*, 'co 'l farâ un ciâld d'unfiâr,
lu clamarin di qualchi diaul *l'Unviâr*.

La buere, sivilând, 'e scosse il lûch;
entre 'te ciase del lavoradôr.
I scurs nò siarin ben; lui nò-l'ha fûch,
e al'è sençe linçui e covertôr.
L'ha lavorât dut l'an; cumò nò-l sa
çe-mût combati il frêd, çe-mût mangiâ!

Diçembar

Chist an l'è tant un fred eceçionâl
che da pôch timp in ca son inglaçâç
âncie i sòçios del Çircul Soçîal.

Tantis fameis chist an nò han çe
ma e' han vût il compéns (mangiâ,
di sintî il Deputât a ciacarâ!

Un tâl al dîs che quând che 'l ven
(l'unviâr
el si mângie, cu-l vin, zeis di moróns.
Nò l'ocôr dí-lu: si capîsc, mi pâr,
che dut il so talént l'è 'te-i... moróns.

Unviâr

Un Siûn

'O viodevi la nèv, çidin, çidine,
continue, malincòniche, ciadê,
e pojà-si su-l plan e pe' culine
fin jú, lontán, fûr de la viste mè.

Il çil blanchîç, sençe soreli, bass,
e in-sòmp, pe' strade blâncie, dôs figuris
di puers viandânç, che levin vie di pass,
piardin'-si a pôch a pôch tristis e scuris.

Qualchi corvât, calând par l'arie grise
come un pont neri su-la blâncie nèv;
e qualchi gardelín che tra la çise
al tentave un svolèt inciárt e grêv.

Lá che di istât van a bagnâ-si i fruç
plens di vite e ligrie: desèrt il puèst.

E su-lis rivis del glaçât rojûç
come di muárt, l'ere un silenci mest.

Árbui nûç, par i ciámps e scredeleç
e' slungiavin 'ta-l'aer i blanchs ramâç
come spetros antichs, che dreç in pîs
malediscin il çil cu-i magris braç.

Qualchi cián mungolave sot il mûr
di casolârs spiardûç vie pe' planure;
e l'aer intánt al si faseve scûr,
e plui fuárt il garbín e la criure.

E la nèv nò fermave: e mi pareve
che áncie iò vess finît cu-l restâ-j sot,
e za su-l stomit la sintivi greve,
quánd che dut in-t-ún colp... mi soi dismòt.

'O ciali in alt: l'è il soreli di Rome
che pûr d'inviâr, da la matine a sere,

simpri el risplènd sore l'Italie, come
al volèss dá-j-gi eterne primevere!

Nadal

Fas fieste, contadín, che come ué
el'è nassût Gesú, nemí dei re,
nemí dei prepotènc, nemí dei siòrs
amí di duc i puers lavoradòrs.
La justíçie, pa-l mond, l'ha prediciât,
e i potènc del so timp 'e lu han piciât.

Jé vignude la mode di contâ
su l'orloi vinc-e-quatri oris al dí.
Fortune che vin simpri dodis mès,
se nò, nò podarèss finì culí.

LA STRIE par l'an 1895

PREAMBUL

"Uere crudêl, batais lis plui cianinis,
insidiis, tradimènc, muárç di granc umin,
assâlç di plaçis-fuárç, bombis e minis,
persecuçions, incendiis che consumin..."

Chest scriveve Zorût pa'l mil votçent
e vincequatri; e iò sençe cambiâ
del so dèt, une virgule o un acènt,
par il novantecinch lu puèsc lassâ.

Pronostich

'O soi sturnît, confûs, meraveât!
dabòn che un câs cussí straordenari
nò-l pò mai plui tociâ, nò-l'è tociât
da quánd che'l còr pa'l mond il miò
(lunari
tant che nò ciati il mùd di strolegâ,
nò savínd se domán soi ca o soi lá.

'Us la conti in doi viárs: E' han
(scuviarzût

che Marte, esaminât cu-i canociâi,
el nus fâs ogni tant qualchi salût
che i astrònomos ciolin par segnai:
se jé cussí, come ch' 'o la sai iò,
lassù par-aer son plui indenánt di nò.

Tan l'è vèr che ca-jú sin intrigâç
a dâ rispueste a tante cortesie;
diviárs mètodòs za son conseâç,
ma anci-mò, posítiv, nò-l'è fat nie.
e intánt lassú nus mostrin l'intençion
simpri plui di tacâ conversaçion.

Áncie i çividalês, int cortesane,
e' studiin par podè-si fâ notâ;
al cafè di San March o de Fontane
e' stan dei dîs intîrs a questionâ;
e 'co ven gnot, duc-quanc d'un sentiment,
saltin fûr a ualmâ pa-l firmamènt.

Ognún al fâs qualchi proposiçion:
un si declare pe' 'letricitât;
l'altri l'ûl meti in òpare il balòn,

za che da un pièc di timp nò lu ha dopràt;
un tiàrc el-ùl i fùghs artificiài;
un quàrt l'ha pront qualchi altri tananai.

Il Municipi al dís che par fâ viodi,
a chèi lassú, che il mond el-è abitàt,
baste — come bessòl ognún pò crodi —
il splendòr che di gnot fâs Çividât,
si capisc: da lontán devi fa impressiòn
la nestre comunâl luminaçion.

Invece Carli al spieghe un gnûv
(pînsîr:
Par cont so al crodarèss che mitînd fûr
dut 't-un colp la so crôs di cavalîr,
lassú la viodaressin di sigûr.
Ancie bon, il progèt nò-l-è acetât:
Ognún l'ha pôre di restâ inceât!

A duc i efieç di òtiche, Maçòcie ¹⁾
al preferisc l'acústiche; e cussí
al domande il permèss di viarzi bòcie
cu-la sperance Marte di sturní:
di fat lis robis che lui l'ha contadis
e' han simpri fat l'efièt di canonadis.

Genio ²⁾ al propòn di usâ un gran
(rifletòr,
come si cròd che 'l fasi Marte istèss:
e infát al va spiegánd, da ver dotòr,
del mecanismo l'inzegnòs process;
l'idee del rifletòr — che 'l mi permeti —
jé buine, ma il difìcil l'è... rifleti.

Il professòr De Stèfani l'ha in ciâv
di cori a ciatâ Marte in biciclete;
e infati cu-i scarpèç e cu-l so brâv
abit da corse e cu-la so berete,
el fâs lis provis, la matine ad-ore,
seguît, secònd la leç, de la so siore.

Ancie Gratón ³⁾ pritínd di rivâ a Marte
cu-l diventâ plui lungh di chel che l'è;
e se j mánçie ancimò une qualchi quarte,

che-l rivi o nò, nissún lu pò savê;
e infát, i tachs des scarpis cu-l alzâ,
cui sa che il cil nò-l puedi un dí tociâ?

Come podès capì, áncie a Çividât
la sciènçe si coltìve cun afièt;
e va-e-nò-vá, la nestre gran citât
scuviarzerá par prime il gran segrèt:
di meti, o cu-l tranvai o cu-l balòn,
la Tìere e Marte in comunicaçion.

In chiste situaçion, pardonarès
se 'o ciati inutil di pronosticâ,
pensánd che da un dí a l'altri podarès
't-un altri mond clamâ-mi a strolegâ;
e alore guai se dut il necessari
nò vess za preparât pa-l gnuv lunari!

Per chest 'o mi dispòn 'te-l an che ven
a mèti-mi su-l ciárt e positiv;
e 'o sperì, se lis ciossis vadin ben,
di jessi, come soi, robust e vív,
par compagnâ-'us, fasínd la spiegaçion
fin a Marte, duc-quánc cun il balòn.

Zenâr

Da chel Strolìch che 'o soi, ben edu-
'us áuguri bon an; ma corpo e fûr (cât,
che 'l sedi un pôch plui bon de l'an passât!

Plui che mi sint a celebrâ "poete"
e plui mi ciati uèide la sachete:
cussí la dí che mi incoronerán,
speri che sarai za crepât di fan.

Mi diseve un marit: Jé une sfortune!
Di fâ fruc mê muîr plui nò finisc:
Parcè nò ha-e di sei come la lune,
plene ogni mès... e mai nò parturisc!?

Si dáis-o meravee
se di unviâr al nevee?
E' mi pâ che sarèss ben plui sorprese
se si sudáss in mániis di ciamese.

Nò si viòd il soreli. Ce rasón!
Cumò di stâ cuviàrc jé la stagiòn.

1) Sandri, dispensîr des privativis e diletánt
filodramatic.

2) Il nodâr de Sènibus.

3) Piçul di stature clamât Fotèl, za impiegât
al ciapitul; al presínt professòr di caligrafie a
Pontremoli.

Fevrâr

Co-l viôt cõtule, Vigî al va daûr
sençe cialâ di çe raçe che sedi;
cussî une gnot, tra la fumate e il scûr,
l'è lâ daûr de's cõtulis.... di un predi.

Nêv e garbîn: — Puer contadín!
Vin e ciapóns: — Puers i paróns!

'O hai tant calôr-'e dîs siore Vignude-
che áncie di unviâr 'o scugni durmî nude.
'O hai rispuindût:— Scusâi-mi, ma jo crôd
sôl chel che 'o viôd!

Il carnovâl al puarte de's risorsis
metînd in movimènt tacuins e borsis.

Març

Cu-i gambai, cu-la barete
cumò i nestrîs ciaçadôrs
van a ciaçe in biciclete;
e se vèssin di incuintrâ
qualchi lôv o-bèn qualchi ors,
plui sigûrs son di sciampâ.

Il nûl tapone — la Mont Cianine,
se nò-l mincione: — Ploje vicine

L'an passât 'e si è scuviârt
che marchês, conç e baróns,
cavalîrs, comandatôrs
e' han robât dei granc milións.

Si son faç dei granc procèss
per ciastîâ duc-quânc i tris-c;
e difati e' han mitût
in presón.... i socialîs-c.

Primevere

Cialait lis cisilutis sot i cops:
Son dutis in facendis par fâ i nîç;
e' svolin vie, e' tornin dúngie a trops;
sençe polsâ sin che nò-j-u han finîç.

Une 'e puarte la tiare cun il bech;

un'altre par il prât e pe' campagne
'e çir qualchi patûsc e qualchi stech;
un'altre l'ale sore l'aghe 'e bagne.

In-t-ún ordin perfèt si va e si ven;
si sgarfe, si comede, si sbisie;
dutis san che il dovê l-è di fâ ben
d'acordo, in uguagliance e in armonie.

Dutis lavorin: non si viôd nissune
a stâ di-bând. E nel común lavôr
lis ciasutis ben prest, ad une ad une,
son prontis per i pîçui e per lôr.

Cialait invece l'omp: Chel che al sfadie
a fabricâ, l'è spess 'ta-l miêç de strade;
e il siôr, che'l stâ sintât sençe fâ nie
al si ciate la ciase preparade.

Oles-o 'mo sintî la mê opiniôn?
Lis cisilutis bravîs e modestis
e' han ricevût il don de la rasón,
e l'omp, apont par chest... lis clame bestis!

La montagne si ris-clare,
il bon timp al si prepare.

Uelin jessi deputâç
duc i siôrs e i milordîns;
nò is-el miôr che nomenais,
contadîns, dei contadîns?

Avrîl

Mi pâz za che Primevere
meti fûr la so bandiere.

Il contadín lavore la campagne
par-ché il paròn al gioldi la cucagne.

Crist, amî dei puarêç e generôs
el-ha finît par chest sore la crôs;
ma in chel timp, mancul mâl, el-há podût
ressuscitâ del popul pe' salût.

Cu-mò 'mo plui nò-l'ul rissuscità;

(1)

1) Mâncie un viârs in cäuse de rifiladure de
úniche còpie che cognoscîn.

Cisilute, ben tornade!
Per te 'o haiuarte spalancade.
Cisilute del mio cûr
il miò tet al-è sigûr.

El-ûl fâ-mi mateâ:
Po' ce! uèl-j-el neveâ?

Mai

Metin rosis e muss in compagnie:
E' son duc argomènc di pöesie.

Sicome al met seren il canociâl,
al ploverà, scomèt, ben e nò mâl.
Se jé cussì, leint il miò lunari,
faseit cont che 'o disèss dut il contrari.

Orèss da-bòn falâ, furlâns, ma chesie
volte, su-l seri 'e cåpite tempieste.

Saves-o ce che han fat i deputâc
che par uestri ben vès nomenâc?
E' han stabilit, d'acordo, une gran leç
cuintri chêi che difindin i puarèc.

Jugn

Di Garibaldi cui si vis-j-el plui?
I guviârs lu ricuardin.... ma per fâ
il contrari di chel che l'ha fat lui.

Si distire; al si ritire;
si fâs strent; al si disténd;
al sfolmene; al si serene;
scûr in bote; jû une gote;
di za al tone; po' al si bone;
vègnie ploje? 'E ha pöcie voje.

Siore Ánzule si lagne che l'è sut;
che j va mâl la salate e il lidricût:
J ocòrarèss une buine sborfade
che almancul 'e durâss mieze zornade.
Da chel Strolich che soi, cu-l so permèss
là sborfarai, se cròd, come ch' 'o puèss.

Instât

Nò son petègulis

— A sagre 'o hai vidût la tò parone
cun-t-ûn siôr furistîr....

— Po' tâs, Catine!
'O lu sai prin di te. Diaul! Nò mincione,
tratan'-si di trotâ la cavalchine!

Ciapièl, abit di sede, ventuline,
cuiarte d'aur par-dût, plui de Madone;
'e sa da-bòn di fâ la galandine!
— E il marit?

— Un batân, che se 'l tontone
al ris-cie di ciapâ quatri scufiòc.
Par chest al viòd, al tâs, e al lasce fâ,
tant plui che pajn par lui altris merlòc.

— E il furistîr?

— 'A-n' bute tanc che 'and-há;
e intânt e' han fat insieme za dôs gnoç
Uhm!... bôcie tâs: nò uei petegolâ!

Vi lagnâis-o che il guviâr
ai puarèc nò-l pense masse?
Taseit! Che nò-l si dismòvi
per mandâ-'us qualchi altre tasse!

Luj

Il Termòmetro

Cu-l gran ciâld siôr Venâncio l'è
(sfinît;
ma-la siore, plui fuarte e in buine etât,
cialând a un bièl termòmetro piciât
'e dis cun árie meste al puer marit:
Il termòmetro al cresc e al si alze sù;
oh, fòssis-tu un termòmetro áncie tu!

“Rosso la sera - buon tempo si
Al mi diseve ir gnot il capelân (spera „
viodint.... brusâ une ciase di lontân.

Faséi'-si, contadíns, une rasón:
Nò bisugne ciaçâ fûr di stagiôn.
Par ogni quaje che maçais in Luj.
Son trente quais che nò nascin plui.

Nò is-al miôr di spietâ qualchi altre di.
E po' a-n' sarâ par duc ; va-e ben cussî ?

Il bièl timp l'è costrèt a bati il tach :
Za-ché il soreli al va a durmî 't-el sach.

La campagne 'e jé sujade :
'E domande une bagnade.

Avòst

A çeselâ il formènt,
a bati la siale,
tacait sot dal momènt ;
giavait i bûs de stale,
puartait dut a so'-tèt
che il timp al-è cujèt
mitut il cinquantin,
(1) . . .

'O hai culî daûr
't-es bisacis del ben e del malân,
vançade da l'altri an,
un pócîe di tempîeste.
Furlâns, bisugne che le metî fûr,
se nò, par l'an che ven, trope mi-n' reste.

Il soreli al si jeve la matine,
par lâ a durmî la sere ;
la lune invece 'e jeve apene sere
par lâ a durmî a matine.
'Ta-l mond son duc cussî, sençe judîçî :
Ognún l-ha il so capriçî.

Come chist mès 'o 'vin vût l'an passât
un lut in-té Operâie Societât :
El'è muárt Lurînc Grabriç, Presidènt,
un omp dut cûr, bontât e sentiment.
Iò da-bòn nò soi sigûr
che il bièl timp al tegni dûr.

Setembar

I cròç ciantin fûr de roje :
'L'è bièl timp, ma e' ualmin ploje.

1) Mâncie un viârs. Si viodî la note pag. 85.

L'altri an la Societât di Cividât
jé lade a San Denêl a passonâ ;
e chêi Sandanelîns, in veretât,
è han fat lis ciossis lôr come che va.

Bièl soreli, bièl timp, biele campagne ;
bon umôr, buine ciere, boins bocai,
di gustâç e mirindis gran cucagne,
fiestis, músiche, fuchs artificiâi.

Nissûn brut acidènt in chê zornade,
fra tante înt zentîl, prudènt e buine ;
une sole disgrazie 'e jé tociade :
Un discòrs, in-té-l-ultim, di Beline.

Primevere 'e jé biele cu-i siei flôrs ;
l'è divertènt l'Istât cu-i bains di mâr ;
el plâs l'Unviâr, massimamentri ai siôrs
che puedin stâ daûr del fogolâr ;
ma plui bièl de l'Autûn nò si pò dâ,
cu-la grande ligrie del vendemâ.

Autûn

L'ucelût 'ta-l mièç de nèv
pur al ciate il so fruçon ;
e l'armente su-i fossai
'e pò simpri lâ a passon.

Il ciavâl l'ha pront il fen
't-une biele mangiadòrie ;
e âncie il giât al ciate il dret
di lecâ qualchi fressòrie.

L'ors, la tigre, la pantere,
ciatin alch di roseâ,
e parsîn la soçe jene
sore i muârç 'e va a raspâ.

Âncie il struç, âncie il camêl
dei desèrç in-te-l-orôr,
ciatin simpri qualchi ciosse
di parâ 'ta-l glutidôr.

Dûncie dome 'te-s citâç,
'ta-l civil consorçi umân,
si ha-el di viodi sençe rábie
dei puars omps muri di fan ?

Su-l'ûe 'vin vude l'aghe un mès intîr :
Il timp al fâs l'ustîr.

Otubar

Il soreli 'l-è un omp ben regolât:
Apene che 'l-è di, lui 'l-è jevât.

Odulutis di passâç:
Çe tonadis, çe fracâss;
sore i prâç de la Maline
crescerà la smajerine.

'E jé plene la lune: o Dio, cui sa
ce dal diamber, furlâns, ch'al nascerà.

Za si fole — il most al cole
'te-l brincièl — 'ta-l caratèl;
l'è in bolôr — 'ta-l foledôr.
Sot in-bote — cu-la bote;
colm auâl — 'l-e za il bocâl.
di-zâ al passe — 't'une taçe
di-zâ al scôr — pa-l glutidôr.
Scole pûr — tu sês sigûr
che in-té pançe — nò-l ti vançe!

El'è vignût, l'Avrîl de l'an passât,
a Rome un trop di siôrs di Cividât.
E cun stûdiis profònc e' han constatât
che si bêv del bon vîn e a bon merciât.
Bisugne propri di: par imparâ
nò-l-è nuje di miôr che di viazâ.

Novembar

L'è grîs il çîl; jé grise la campagne;
l'ucelût su-l ramâç pa-l frêd si lagne;
lis fueis e' svolin vie par l'arie scure,
jé strache e scoloride la nature.
Il cûr si strenç, amis; 'e jé spontade
dei muârç la melancòniche zornade.

I petorai son ca:

L'Unviâr nò-l pò tardâ.

Chiste lune varin e nêv e plôje;
buinis p-e ciaçe!

E sglonfâç i torènc, i flumps, lis rois,
e buere e glaçe.

Del rest al pò áncie sei che dut in plen
vebin serèn!

Ce frêd! O ce criure!
S'ingrisignisc la nature!

Decembar

Soi saltât fûr par lâ a la speçerie,
e, co-l scûr, soi colât 't-un' osterie.
Cui puèd-ial dí-mi che nò sei uarît,
apònt par la rasón ch' 'o hai sbagliât sît?

Nò-l-è ce dî; l'è frêd e di chel bon:
'O colín 'ta-l-unviâr a tombolòn.

Unviâr

Ce abondance di ciaçe! 'O 'vîn savût
che su chel di Tojân doi contadîns
une piçocie intèrie e' han vidût
a svoletâ par jenfere i paludîns.

Ogni bon ciaçadôr al'è jessût,
armât de l'arcabûs e di balîns,
pe' puarte San Domeni, ben vistût
e cialcât a dovê. Cu-i caretîns,


cun bris-cis, cun cariolis, cun landò
a pît, a muss, a schene di nemâl,
duc-quânc son lâc in rive del Ciarò.

L'è, p'e piçocie, un moto generâl;
tant che si spiete — a chel ch' 'o hai
(savût iò
persin un treno, di Udinês, speciâl.

I velocipedîs-c di Cividât
si lamentin che nò han lûch adatât,
par fâ lis corsis. Uêlin-o une piste
slisse, nete di class, e in bieie viste?
Un pòcie di paçiençe: il frêd 'l-è bon:
che spietin che'l si inglaçi il Nadisòn.

Mont Majôr el-ha frêd, a chel che 'l pâr,
tant l'è vêr che di nêv el-ha un tabâr.

Furlâns! e' son nûv ains che 'o fâs la
e anci-mò nò sint fregul di fadie; (Strie,
sperín áncie cent ains di podê vivi;
duc vo-altris par lêi, e iò par scrivi!





Checo Blasòn

Poete


n. Udin 24 avòst 1827 m. 24 luj 1909



prof. Valentín Østerman

Folkloriste

n. Glemone 22 fev. 1841 m. Treviglio 16 ot. 1904



prof. Bastián Scaramuče

Poete, filòsofo

n. Grao 12 zenâr 1829 m. Viçençe 4 av. 1913



'Cifich Ciampane

Poete populâr

n. Rodeán dal Bass 10 avòst 1868 m. Martignâ 7 set. 1921



Arturo Valzàch

Comediografo

n. Udin 7 jujn 1863

m. 20 marc 1928



Toni Recardín

Marionetiste

n. Vignesie 1804

m. Udin 28 jujn 1876



Leòn Recardín

Marionetiste

n. Udin 27 set. 1844


m. 16 fevr. 1914



Fracanape

Salmistrelì

creât a Udin l'an 1828 che nò-l murirà mai plui



Altris poesîis furlanis di Guido Podreche

Si lu capîsc

Hai bandonâç i lûghs de prime etât,
il miò Friûl, i monç del miò paîs,
e vie par mieze Italie 'o hai zirât
par cognòsci-le ben dal ciâv ai pîs.

A Bologne cumò mi soi fermât
e hai fatîs relaçions, hai faç amis
e 'o devi dî che in cheste gran citât
une giolderie 'i) e' son duc-quânc i dis.

Ma folch j-u traî! se olevin che 'o capîss
il lôr lengaç, ripèti-mi scugnivin
tre o quatri voltis duc i lor pastîç.

E quant che iò su-l prin a chestis frutis
fevelavi in furlân, nò mi capîvin,
e infîn 'o hai dît *amôr*, e' han capît dutis.

Forumjuli, IV, N. 20-16 Luj 1887.

1) Vòs manciânt 'ta-l Vocab. Pirone, sec. ed.

Un consei comunâl ('O crodevi....)

— Ce dis-jal chel mussât là jù da-bâss?!
— 'O dis çe che mi pâr, brut pipinòt!
— Pipinòt sarâ lui!

— Che'l vadi a spass,
e nò vignî ca-sú par fâ il sbregòt!

— Giò!... la finis-o? 'Us dôi quatri patâss,
culî comandi iò!

— Bravo merlòt!

— 'O sin in-t-une vere stie di maç,
'us mandî a ciâ'-del-diaul e buine gnot!

— Mâscheris:

— Arlechins!

— Voltâbandiere!

— Purcinei!

— Marionetis! Pantalóns!
Cussî duc-quânc sberlavin in chê sere.

'O crodevi di sedi in carnovâl
o su-l merciât dei bûs e dei ciastróns,
e 'o eri.... in-t-ûn consei municipâl!

Forumjuli, 7 dec. 1889.

Tignin-si strenç

Par solit un guviâr al parlamènt
el'ha un piçul partît d'oposiçion
inveçe t-al Consei in chist momènt
la minorance 'e jé a la direçion.

Ma chist no-l-ûl di nuje: il sentiment,
l'amôr di pâtrie e de populaçion,
e' fasin che la Giunte e tegni strent
e che nò vadi a-bâss a tombolón.

E' son duc-quânc unîç in-t-une idee:
a dispièt del Consei simpri regnâ,
e tignî-si ben strenz a la ciadree.

La questîon di opinións nò ha ce fâ:
predis o radicali, duc in famee,
e' han un sol *partît*; chel di restâ.

Forumjuli, VI N. 50 - 11 Dec. 1889
(Pôs dis dopo, si ha vude la crisi municipâl)

Confessións di un conseîr

Dovarèss jessi cussi

Vios-tu, Pieri, áncie iò varèss in ment
di tacâ-mi bièl sclet a di un partît,
e in-fin di meti fûr chel sentiment
che in-t-âl miò ciâv 'o hai simpri nudrît.

E par dî-le cussi si sta un momènt;
ma 'co jé dite nò-l'è dut finît:

Bisugne che provassis çe tormènt
che l'è a mèti-si duc su-l'istèss pît.

Áncie iò 'mo vorèss che la rasòn
'e si metèss fûr clare, e che ognidún
nò-l si lassáss sgurlâ come un minciòn.

E che, da lis dôs bandis, in Cumún,
e' combatessin duc pe' so opiniòn
sençe cialâ in-t-é muse a di-nissún.

Ma inveçe e jé cussi

Ma un tâl nò-l-ûl savént di un Conseîr
parçè che in strade nò-l lu ha saludât;

un al dá a un altri il vôt mâl vultîr
parçè che za doi ains e' han barufât;

Tîcio, che l'è compari di un ustîr,
el sa che a la massârie su-l marciât
Câio l'ha dît par râbie di mistîr
che il so vin al'è dut-quânt faturât;

un tal l'ha cun Semproni qualchi afâr;
ma al le ha sù de altre bande cun doi tre
che han cambiât dît-e-fât di butegâr;

e cussí l'opiniòn al dí di ué
magari 'e pò mudâ dal scûr al clâr
per 'vê piardût a brîscule un cafè.

Conclusion

In chist mût sin rivâç, sençe savê
se sin o blanchs o ross o verç o turchîns
a impastâ sù un regno sençe re,
e a lotâ sençe ideis e sençe fins.

Cussí si va indenânt, sençe un parçè,
a fâ-si dispietûç come frutîns.

Chêi che tignivin îr e' molin ué,
chêi altris e' si tachin ai rimpîns.

La Giunte intânt contînué a comandâ
sençe che la ubidisci mai nissûn:
'e fâs par dâ a chêi altris di disfâ.

E cussí sençe un Sindich svelt e brâv,
podarín simpri dî che in-tâ-l Cumún
o' vin dei Conseîr, ma sençe ciâv.

Forumjuli, VI N. 52 - 28 Dic. 1889.

Su e jù

Ogni tant, 'te çitât del Nadisòn
al nasc e al salte fûr, da îr a ué
un sapiènt, une çime, un talentòn
che l'è un grand omp... e nò si sa il parçè.

Sore di lui jé subit gran questîon
fra la siorie, in buteghe di cafè;
ma infîn duc-quânc conservin l'opiniòn
che l'è un gran omp... ma nò si sa il parçè.

Is-al miedi, avocât, mestri, inziugnîr,
mòstri-al, cun qualchi libri un gran savê;
in-fîn dei conç, sa-el fâ qualchi mistîr?

Nuje del dut! Ma lui l'è chel che l'è;

e chest al baste a fâ-lu Conseîr.

Cussí el va sù... ma nò si sa il parçè.

Ma dopo, i citadîns del Nadisòn,
e' vegnin a capî da l'îr al ué,
che la çime, il sapiènt, il talentòn,
al è un babân... e nò si sa il parçè.

Sore di lui 'e torne gran questîon
fra la siorie, in buteghe di cafè;
e in-fîn duc-quânc e' fasin l'opiniòn
che l'è un babân... ma nò si sa il parçè.

Ha-el mostrât di sei müss come
come avocât; opûr di nò savê (inziugnîr;
nâncie di fâ per so cont qualchi mistîr?

Nuje del dut! L'è simpri chel che l'è:
par chest son stufs di 'vê-lu Conseîr.
Cussí el va jù... ma nò si sa il parçè.

Forumjuli, VII N. 1 - 4 - gen. 1890.

Diviârs si son crodûc colpîç da ches-c sunèç.
Al è un articulût a chest proposit tal stess
giornâl dal 11 zenâr. - Si notî che chest se-
cônd sunèt al-è a rimis obleadis.

Il Conseîr model

'O puèsc 'mo 'vê âncie iò la mê opi-
e par nuje nò mi han fat Conseîr; (niòn
ançi mi han dât il vôt per convinçìon
e ross, e blanchs, e neris vultîr.

Parçè che iò cu-l miò sisteme 'o çir
di dâi-gî a duc un pòcie di rasòn;
e 'o dîs che il Re l'è brâv 't-al so mistîr
e il Pape chel che al fâs lu fâs benòn.

Uèlin-o pe' lôr glésie un gnûf altâr
o-pûr par Garibaldi un monumènt?
Iò soi pront a votâ dut chel che ur pâr.

In quant ai *fins* iò soi indiferènt,
ma in questîon di *principis* 'o hai a ciâr
che mi crodin sincêr e indipendènt.

Forumjuli, VII N. 32 - 9 ag. 1890.

Da lontán

Culí, lontán dal verd des mêis colinis,
da la bieie planure del Friûl,
fra chestis neris muris citadinis,
che nò sintin il ciânt del rusignûl;

lontán da la gran pás del miò pais;
in mièç ad un continuo tananai,
'o passi malanconichs i miei dís
sençe mai podè di un bièl *folch-ti-trai*!

E-pûr nò mi lamenti; e in chist mistîr,
se áncie nò crôd che'l basti un pôch
a riformâ d'un colp il mond intîr, (d'inzèn
'o met, par la mê part, dut-quánt l'impèn.

I tîmps e' son mudâç: un aer al tire
di gnôve fede su-la soçietât,
che cumò pense a cui che in bass suspire
con un pôch plui di afièt e umanitàt.

Per cui che l'ha del cûr, al'è ce-fâ;
ognûn, o grand o piçul, l'è clamât,
secònd lis fuarcis sôs, a lavorâ
pe-l triònf dei diric de umanitàt.

La uestire, o miei furláns, jé une
(mission)
— lontan da lis batais — di pás e amôr;
e sençe gran sussûr, vês fat benòn
a judâ-si tra fradis di lavôr.

Áncie chest el'è un mûd par arivâ
al nobil fin che 'vin duc-quânc in ment:
"Dái-gi a duc la maniere di mangiâ
dant a ognûn la so part di godimènt „

Cussî pensait se iò 'mo, corpo e fûr!
nò vevi per la uestre soçietât
di mandâ di culi, dal fonç del cûr,
l'auguri de plui gran prosperitàt!

E 'us lu mandî in furlán; un bièl
(lengâç)
ch' 'o imparai da frutât, quând che pe's
'o corevi cun altris frutaçâç (stradis
a fâ ogni sorte di berechinadis.

Cumò che uelin fâ-mi un omenòn,
pretindin che nò fasi il matarán;
ma, birichín o seri — corponòn! —
soi stât, 'o soi, sarai simpri furlán!

Par-chèst, come furlán, al miò Friûl
auguri che a nissún al sei secònd
ne-l marciâ a flanch del gnûv progrès,
(che l'ûl
meti un pôch di justîcie in chist brut mond!

Bologne, setembar 1891

Nel numâr unich - Libertà e lavoro - per il 25º
Anniv. fond. Soc. Op. Generale di Mutuo
Soccorso.

Nel prin çentenari de la nâscite di Pieri Zorût

(Dite a Lonzán al gustâ comemorativ il 18
di Setembar 1892)

Ca l'è nassût Zorût, nò te-s riceçis
che fasin façil l'esistençe ai siôrs;
ma in mièç ai lavorènc, che lis campagnis
e' fecondin di stenç e di sudôrs.

Da piçul popul l'è nassûd: ma grand
al si è jevât a luminose alteçe;
parçè la fuarçe de l'inzèn umán
nò cognòs né misèrie, né riceçe!

Ca l'è nassût Zorût; ca l'ha imparât
fin dai prins ains a fevelâ furlán,
ma il poete Zorût l'è diventât
par alteçe d'inzèn, poete umán.

Lui l'ha ciantât come j detave il cûr:
par duc amigo, e par nissún stranîr;
parçè che, sore raçis e confíns,
l'inzèn al'ha par Pátrie il mond intîr!

La planure lontane, i monç, il çil
e de immense nature l'armonie,
j han donade dute la dolceçe
e il sentimènt che l'è in-té so poesie.

Il popul che fra mièç ai patimènc
l'ha pronte la satiriche ridade,
nel estro di Zorût, dute l'argúcie
de so filosofie l'ha travasade.

E Zorût l'ha ciantât come un artîst
de's beleçis del mond inamorâd;
e Zorût l'ha ciantât come il so popul:
alegri simpri... e simpri disperât!

Par chest cumò la vòs del nestri popul
'e rispuínt a la vòs del so cantôr;
che l'ha dât simpri un ciánt a la ligrie
e une lágrime simpri al so dolôr!

Par chest cumò e' concorin d'ogni part
i furláns de montagne e chëi del mâr,
a onorâ la memòrie di Zorût,
memòrie di poete popolâr!

Il to siúm, o poete, l'è compît
'co tu disevis: "mi concedi il çil
istèss che il bièl soreli rispèndènt,
istèss che lui di tramontâ trançuil „!

Magari cussi-nò! come il soreli
nel mâr de l'infinit, acompagnât
da la gran armonie de's tôs cançons,
tu sês, o gran poete, tramontât.

Ma sore lis montagnis del Friûl,
come il soreli simpri al tornerà
âncie dopo il tramont, eternamenti
la glòrie di Zorût 'e splenderá!

Da lis pœsiis furlanis. Cividât, Fulvio. 1894.

Gnoçis d'Attimis - de Vardacca

Rome, 20 Otuber 1892.

Ai spôs

L'avîs del matrimoni, al mi è rivât
fra il sussûr e il davoî de' capitâl.
Po' ben po'! mancûl mâl:
La raçe nò finîsc a Çividât!
Sin che si van plantând
des fâbrichis di fruç culî e culâ
si pò da-bôn sperâ
che ancimò il mond al vadî seguitând
almancûl sin che nô-atris stin in pîs;
in quânt po' ai nestrîs fis,
se nò savarân fâ-lu continuâ
qualchi spîrito-sant proviodará!

Iò hai plui d'une rasòn di sei contênt
dal biêl avenimênt:
iò ch' 'o cognòsc il spôs, 'o ch' 'o lu sai
zovin di cûr, di merit e di ciâv,
atîv, modêst e brâv;
e che in timp di birbânç e basoâi,
di laris, di stroçîns,
di pandolos, di muss, di milordîns,
l'è galantòm e inteligênt; siché
al sarêss miò parê,
fondât sore un'antighe sperîence,
che buine plante 'e déi buine semençe!

Lassú, sot de l'antîgh, nel gnûv cis-ciêl
coronât di culinis,
sot il çîl del Friûl celêst e biêl,
denânt a lis planuris verdulinis,
músiche! sunadôrs!

Ligrie di popolâns! Riuniôn di amîs!
Alegris, matarâns!
Augúrios! barzeletis! çianç! discòrs!
e in miêc a tant diaulêç
qualchi butiglie vècie di svuedâ,
del vigiêl, dei polêç....
Ah! mi displâs da-bôn di nò sei lá!...

Inveçe 'o soi cu-lî, lontân dai spôs,
in chist dí che par lôr l'è il plui beât,
sençe 'vê il mûd di dí-j-gi a vive vòs
dut chel che o' sint in cûr pa-l bon amî,
e pe' so zentîl spose,
che la vite j farâ colôr di rose!

E — a dí la veretât —
mi displâs âncie di nò sedi lì
par podê dimostrâ cu-l glutidôr
che ai sposalicis 'o sai fâ-j-gi onôr!
E che, pûr che si tratî dei amîs,
'o mangiarêss daur-mán âncie vot dîs!

Ma j ûl paciêncie; e 'o speri che l'istêss
fra duc i componênc la compagnie
regnerà la ligrie,
l'apêtit e il murbîn;
cussi se âncie iò manci, a la fin-fin
dei ciapóns resterán apene i uêss
e in ciânive lis botîs sençe vin!
Ma iò, par fâ par vô-atris chel che 'o puêsc
e par nò piardi dut,
restând a pançe uêide, e a lavri sut,
mi invidi a ciase uestre a un biêl gustâ...
per il prin fantolín ch'al nascerà!
ne l'aspetative mi declari:

Guidòn Salvadi

'E sa ciòli-j-u

Siore Catine 'e ha un grum di cortesâns
che fan la smire a je e ai siei carantâns;
cussí che pararêss che in tante resse
'vess di restâ une volte compromesse;
ma je — sicome maridâ-si nò ûl —
si contente di ciòli-j-u duc pa-l cûl!

Purgatori

'O hai stampât che Don Ciccio ¹⁾ al'è
(un baròn
par chest e' mi han mitût in presòn.
Si sa: la peresòn purghe i peciâç
di chêi che al mond si son disonorâç.
Lò 'o stoi dentri contènt par chel puar om,
cussì, 'co torni fûr... l'è un galantòm.

Dal volumût *Poesiis Furlanis*

1) Checo Crispi plui voltis pressidènt dal
Consei dei Ministros d'Italie.

La Strie di Guido Podreche ¹⁾

lò da-bòn 'o hai let la Strie
dal prinçipi si al fin,
e puès di sençe fadie
che al'è un libri moscardin.

In chest libri iò lu nûl,
e mi pâ di sei profete,
che la Pâtrie del Friûl
'e ha ciatât il so poete.

Dopo muârç ju Elzevirs ²⁾
e cun chis-c lusôrs di lune...
si capisc sençe ciârç zirs
se i poetis han fortune...

Ma pur deniri al cialderon,
là che al bol dut l'avenir
cui giavâ-mi sarèss bon
il gnûf stampo dal pinsir?

Dúncie a lui che ha inzèn da vindi,
nissún mâl el nascerà,
se 'ta-l Strolîç l' 'orâ spindi
la miez'ore del polsâ.

1) Il *Forumjuli* dal 16 fevrâr 1889 al publi-
cave ches-c viârs di autorevul ilustratôr di ciossis
furlanis, alore a Turin. Cui sarâ-jal?

2) Famosis edicions in 12^{im} de officine fon-
dade a Lèide da Vinture Elzevir (1583-1652).

Retificaçions a lis notis precedenç, vudis da un esimi furlaniste di Cividât.

- Pàgine 13 note 1 — Tite Beline, paròn dal caffè Beline. (nò principâl)
" 26 " 4 — Segretari comunâl, nò fradi dal segretari.
" 36 " 2 — Sunadôr di clarinèt, nò di flaut.
" 46 " 2 — Siôr Tite Vughe, beciâr, possidènt, un dei tre pressidènt
dal Teatro, comproprietari de dite Carbonaro e Vuga che
'veve l'Esatorie des Impuestis a Cividât.
" 47 " 5 — L'Ebreo di Bepo Apoloni di Vicençe (1822 — 1899) rapre-
sentade al teatro "La Fenice", di Vignésie il 23 zenâr dal 1855.
" 54 " 3 — Siôr Checo Bevilâqua, di Cividât che al stave in Borgh
San Domini.
" 56 " 4 — Ricardo Albín fradi di Lurinç de Bance Cooperative.

Nò 'vin podût viodi dutis lis anadis dal *Forumjuli* ta-l quâl periodich 'e
podarèss sei qualchi altre poesie dal Nestri. Cui che l'ha la pussibilitât di
consultâ dute la racolte o cui che al vess altris composiçions èditis o inèditis
al farèss ben a comunicâ-ni-les. 'Te pròssime dispense si darà la vite di Guido
Podreche

IL PÊT A GURIÇE

Poemèt in cinch ciânç dal Cont Tite Puarte udinês, sore un câs sucedût a
Guriçe dal 1810 sot il guviâr italich.

Ciânt prin

1. — Par tociâ alegri il chitarin d'a-
cui, sante Muse, in so favôr ti 'ûl, (môr
cui la lenghe esaltând di un oratôr,
cui par alcâ un eroe par-sore il nûl;
iò pûr t'invochi par ciantâ il valôr
di un portentôs e famosissin cûl
che al'ha mitût so-quadri une Contee
con une semplicissime coree.

2. — Di chel cûl che per l'ápice de
di Omero o di Virgilio orêss la'pene (glòrie
che, mandând ai pósteros la stòrie
cun vîvs colôrs rapresentâss la scene;
ma sdrondenând, quâl son di covertòrie
la cetre mê discorde e sençe vene,
come il pulç intrigât mi viôd ne' stope
gratan'-mi de la rábie la codope.

3. — Diventi scove opûr ascreo ¹⁾ ma-
sglonfe hai la gose e plui tasê nò puêsc, (çèt
Apolo prejerai che j ciati il dret
un rai dal so lusôr mandan'-mi aduêss.
Alore da un tal Dio vignînd profèt
il grop imbredeât disgredearêss,
la cetre non plui tant scarabotânt
manco ingrât al sarêss áncie il miò ciânt.

4. — Mostrave il frêd l'ingrisignide
che sburtave la int a l'osterie (ciere ²⁾)
e par fâ front al businâ de buere
si unive dúngie il fûch in compagnie,
gran farcadiçis ³⁾ come un ciâmp di guere
faseve di moróns in simetrie,
voltave e sovoltave la bujade
per dâ al bocâl plui tènere bussade.

5. — Il citadín lassade la campagne
nel so palâç di luss ere tornât,
i ding scussave l'òride montagne
e il fossâl si viodeve dut glaçât,
scuindude ne la tane ere la magne
arsît da la zilugne al'ere il prât;
cialând il bosch faseve orôr e dûl
sôl restave supiarbi il piçe-cûl.

6. — In tâl crudêl e rigide ¹⁾ stagion
al passe su-l lunari Sant'Andree: ²⁾
Festègie romorôs in chê ocasion
merciât famôs, citât di gran Contee;
concôr ognûn cu-i bêc e con l'unìon
onde in tal dí non manci meravee,
ócie, agnêl, macaróns, corsis di muss
e' fasin viodi d'int fluss e riflûss.

7. — Come i viârs nel formadi buli-
formând un batibui zovins e viei; (gavin
duç erin facendâç, part contratavin
di còculis, gubanis, biscotei
altris fuárt par justâ-si contrastavin
di arcis, stomblis, citis e tondei
galantariis di fine qualitât
arivadis da Londre in quantitât.

8. — I ciarlatâns avolte in fuee d'arint
véndin pâtime inglese pe'i stivai,
per la grateose ⁴⁾ sorprendènt unzint,
manteche risanânt da dug i mâi,
balsim prodigiôs pe'l mâl di dint;
ciròt famôs estirpatôr dei câi:

1) Prime leçion: bârbare.

2) 30 di Novembar. La famose fiere 'e sucèt
dal lunis dopo il 30 par 15 dis.

3) Prime leçion: di gubanis..... co-i ufiei.

4) Probabilmentri la rogne; vôs manciânt
in Pir.

1) De vile di Ascrea dapis de l'Elicone, dulâ
che lis Musis vevin particolâr culto.

2) Prime leçion: l'ingrizide austere.

3) Grumûç come chêi dai farchs.

Vistúc a neri i strolichs ciaminánd
e' lavin lis personis stologánd.

9. — Quánd il rich sapientissin Salo-
la gran fame ne-l mond avínd spandút (món
a cori d'ogni bande in processión
tant popul radunât non fo viodút,
e di Menfi ¹⁾ il merciât in paragón
per dónge d'un zigánt pareve un frut,
ciatan'-si a vendi il sciâl di Cascemir ²⁾
fin a la piêl del giât, del farch, del glîr.

10. — De cuarde e de scevole il ven-
per ogni bande al zire lis contradis, (ditôr
co-l cuêl sglonf pavonâc dal glutidôr
di quând in quând dá fûr ciartis ucadis
che, dât un spach la dame al braç del siôr,
j restin lis orelis sbridinadis:
Dut si sopuarte in pâs in chê zornade,
zornade d'alegrie da un piêc spietade.

11. — Ma si sint di chê bande un sivi-
che la músiche al slambre a plui podê; (lòt
ciale la int che a grops sburtan-si e a trot
smaniose côr a viodi ce che al'è:
al'è Pajaço ³⁾, che plantât casôt
lis sôs prodeçis l'ha di fâ viodê,
de so trupe il valôr, la meravee,
equilibris e sfuârç cu-la ciadree.

12. — Sençe bati palpebre a bôcie
a mil j fâs corone il popolâc; (aviarte
il piçulît par uadagnâ une quarte
si alçe su-i pis e si fâs lûch cu-i braç;
si ricêv qualchi poch o qualchi stuarie
per lâ indenânt e viodi sençe impâc,
si ciòl dut di bon stomi e si sofrisc
parçè che un-mònt Pajaço al divertisc.

13. — In diviârs lûch la stridule trom-
altre calche di int ha radunade; (bete
il zûch dei bussulôç e de sachete ⁴⁾
fâs mostre quant 'e pò man rafinate,

che solevan'-si il zuch de sfere abiete
lu giòld sençe rossôr qualche velade ¹⁾
e, se ben scrusignais ogni ciantòn,
uât, uât lu sore ²⁾ il nobil e il baròn.

14. — L'ombrele sot il braç, è in bragòn
giòld il fatôr de vile in sante pâs (curt
cu-l comedòn, j ciaçe qualchi sburt
al capelân, e, ridin d'ogni câs.
Reste al vilân d'inteligençe curt
misteriose la bale fûr del nâs
e discorínd fra Páuli e Pieri-Antoni
lu júdichin un pat fat cu-l demoni.

15. — J pâs il timp che quasi un lamp j
e ben spindút in tantis meraveis, (passe
né puedin mai cu-l ciâf orizontâ-si
a penetrâ i secrêç cu-lis ideis;
nò fasin il cerviêl che lambicâ-si
e di-bânt stan atênç, archin lis ceis
mentri l'amigo scaltri cu-l'ingian
j fâs sparî la robe strete in man.

16. — La trusse ³⁾ intôr a bati cu-l pla-
strusciât e strach il ciarlatân scomençe (têl
e come al foss falcúc di uciei flagêl
si sparpagne e sparisc quasi l'udience:
Ma pûr fra tang si ciate chest e chel
che al'è om onorât e di cosciençe,
e, stand sald, 'a nò-l'ûl che la fadie
sençe il premi mertât 'e torni vie.

17. — Abenché pòs di lôr e' sein re-
une sume di bêt j salte fûr: (staç
S-ciampin i sôl sbalâc da l'imbarâç,
restin i bogns paróns e chêt di cûr.
Sar Tite sençe sangh cu-i sgrisulâç
si palpe sençe borse, e quasi al mûr;
il sborsarûl j ha fate la burlete
fasin-gli restâ vèdue la sachete.

18. — Onde fâ viodi ombris, cosmora-
son cartelóns su-i mûrs par ogni bande, (mis
di France ress antichs, romanis damis

1) Antighe capitâl del bass Egit.

2) Regiòn de l'Indie, ne l'Himalaja ocidentâl

3) Considerât ancimò un non propri che
atualmentri l'è diventât un non comùn.

4) Zûgh di prestigio probabil, cun sachèt dopli.

1) Persone distinte. Ancimò si ha la perâule
mieze-velade par indicâ un de borghesie.

2) Ciòl vie.

3) Bâti-le, domandâ il compêns.

mostrin in cere cun sassine bande.¹⁾
E dei muârç di Vençón se pûr tu bramis
ti presentin la sèrie memorande,
de regine Candace²⁾ lis çavatis,
e del león nemeo³⁾ áncie lis çatis.

19. Del gabinèt mecanich a l'invit
se tu vâs, lá tu viôç ciossis plui bielis;
a puntin Çividât ti ven descrit
i cialunis, i siôrs e lis citelis,
l'eterno frêd pelôs ingrisignît
e il vint taçât a ponte di gusielis
con dutis quantis stuartis lis contradis,
priu che foss fat il spali fabricadis.

20. — Insume tu pûs di cun libertât:
bòcie ce us-tu? che tu ciatis dut,
di divertî si ciate a saçietât
tant il vieli assenât che il piçul frut;
'a-nd-è per duç, e a dî la veritât
ognún al passe il timp con gran costrût,
e se di Cresò⁴⁾ áncie il tesaur tu vessiss
fra viodi e contratâ tu il logaressiss.

21. — Svolin lis oris, svolè la matine
fra ju contrâç e qualchi meravee,
cèrcie il forêst giavâ-si fûr la spine
de's comissions avudis de famee;
misure i bêç, ai cálcole, combine
di cioli dut e di finî al spessee:
l'ore al tratôr l'ul giöldi-le tranquile
e dut sorâ⁵⁾ denând di tornâ in vile.

22 — Fin da timp remotissim fo im-
in un pais del mond pròvide usance, (plantâd
e a dut rigôr fo in sèguit conservade
sei per mudâ di etât o circostance,
usance benedete e un-mont beade
parcè che trate del vantâç de pançe:
Scoltaimi, 'us prei, cun dute l'atençion
che farai miei che 'o puêsc la descriçion.

1) Ancie in chê volte si costumavin lis ripro-
duçions di personâgios in cere. Za 40-50 ains
l'ere in voghe il Museo ambulânt Dessort.

2) Regine etiòpiche in Núbie (22 ains prime
di Cr.)

3) De val Nemeo in Argòlide (Grécie ant.)
strangolât da Ercole.

4) Ultin re de Lidie (Asie Minôr) proverbial
pe's sôs immensis ricieçis (558 dev. Cr.)

5) Svagâ, distraj-si; esaminâ (?) Cumò cheste
vôs 'ul dî pluitòst *cioli vie*.

23 — Apene che il miêç-dî bat su la
si sintin dug a sbrundulâ i budiei, (roche¹⁾
sei riche la persone o-pûr pitoche
'e lasce inpastanâç dug i faç siei;
si tronche ogni contrât, ché dree al poche;
piçul contrât o d'importançe al sei
e se áncie si ciatassin dal barbîr
corin cun mieze barbe da l'ustir.

24. — L'orgasmo, il mescedâ-si e il gran
di chê máchine d'int in confusión (fermént
árdue sarèss imprese impertinént
per quâl-si-sei scritôr la relaçion
disgredeánt chel imbarâç a stent²⁾
bulighin per la strade in procession,
si petin sburç, si pes-cin i talóns,
lavorin par la presse i comedóns.

25 — Dai negoçiânc lis puartis son
e lis barachis calin jú lis telis, (siaradis
nò si viôd plui nissún per lis contradis,
compariscin soltánt³⁾ lis sentinelis,
son dutis lis personis ritiradis
a nasâ caçarolis e padielis.
L'è un silénçio tant grand e tant perfèt
che mieze-gnòt 'e pâr e duç 'te-l jet.

26. — Tornât a ciase l'ere il citadín
che in pont ciatâ la táule preparade;
mole un scivil a mûd di berechin,
segno che la mignestre sei puartade.
Al trate qualchi am-i fûr di confín
per rindi plui festose la zornade
Sant Andree l'ul sorâ-lu⁴⁾ in alegrie
mentri une volte a l'an al passe vie.

27 — Per logâ tante int ne la locande
il tratôr e l'ustir son intrigâç,
per contentâ a puntin ogni domande,
une montagne ocôr di ciç, di plaç;
clamin il camarîr per ogni bande
a jessi prest servîç e distrigâç.
Fite, il clerich del domo, lis ciadreis
sòlite usance al timp des meraveis.

(al continue)

1) Sul cis-ciêl de citât.

2) Prime leçion: Puartan si fûr da l'imb.

3) Prime leçion: solamentri compâr la senti-
nele (rimând cun tele e padiele).

4) Passâ-lu. Significât non notât in Pirone.

LÚÇIE — (*contente che sei vignude*) Che vegni, che vegni e cui sa che ance je nò vedi part interessade in chest imbroi, je che si intindeve cussì ben cun miò marit, il podestât.

COMARI — Po' ce dîs-ie, siore Lúçie?

LÚÇIE — Siârç afârs j-u san dome che lis comaris.

TITUTE — (*sôl*) Batisin in viste se j entre la comari.

PRE NOÇÈNT — Siore Lúçie, che viodi 'mo; iò nò mi ciati in câs di lei fuárt ce ch'al'è scrit ca dentri. Mi baste di savè la robe, e ciárt, siôr Tite, 'e jé une vore sèrie.

TITUTE — (*sôl*) 'O 'nin simpri plui sot.

LÚÇIE — (*tornânt a ciapâ la lètare*) O la learai iò (*la lire fur de buste e la displee*).

VENÂNCIO — (*a Esterine*) El mio amor par ti nol se fuscara, cara, succeda quel chel vol (*la ciareçe*).

LÚÇIE — (*'a lèi comentând*) Caro padrone, (*a Tite*) Tu capiscis, eh?

TITUTE — Malandrete, cheste 'e jé Cândide.

LÚÇIE — (*continuând*) "Sappia che 20 giornî dopo arrivata a Cedarchis, giusto come preannunziò la Signora Comare (*a la Comari*). Che sarès jé, sa-e (*'e continue*), ho messo alla luce un bel maschietto al quale ho messo il nome di Giovanni Battista.... (*a due*) Capiscin-o? „ Giovanni Battista.

TITUTE — (*contemporaneamente*) Fertae (*al sta par vignî-j imbâst*).

VENÂNCIO — (*tignin-lu sù*) Basta, basta, che ghe vien mal.

TITUTE — 'O soi copât.

LÚÇIE — Lassâi-lu, lassâi-lu, cumò al ven il bièl. Nò-l mûr nò.

(*La Comari, Mòmolò e pre Noçènt discutin fra di lôr pûr stand atênc a chel che al sucêd*).

TITUTE — L'ultin tiròn, dai, distrîghi-ti (*Esterine j dá corágio*).

LÚÇIE — Scoltait: "Ho terminate quelle poche di centinaia di lire che mi
" ha date alla partenza ed ora sono ancora a pregarlo per poter averne
" delle altre per il battesimo e corredo del caro neonato. Ricordandolo
" sempre

Sua indimenticabile

Candida „

Ah! ce j pâr-ial? ce 'us pâr-ial? nò baste el scandal ma ancemò stracâ un patrimoni 'tôr di chê.... bôcie tâs. E a mi fâ-mi dut chel po' po' di bordel parcè che vevi un poce di confidence cun chel puar Agnul Basandiele. - Dut al'è finit, dut, e domân 'o larai a Udin. Invessit de's secondis gnossis 'o farin la separaçion. E dopo rângiti, pôc di bon. Ariviôdi-si. - (*'e vâ par lâ vie ma pre Noçènt j sbare il pass. - Esterine vaînt 'e va a fermâ-le*).

PRE NOÇÈNT — Nò, nò j permèt di lâ fûr.

LÚÇIE — Cumò la so missiòn 'e jé finide.

ESTERINE — (*contemporaneamente*) Scolte mame, scolte, sei buine.

PRE NOÇÈNT — Nò jé finide. Par-ché sei finide, e come ch' 'o vuei iò, zaromai ch' 'o soi in bal, jé 'e devi scoltâ la siore ca, che dal sigûr 'e puartará un po' di lûs. La mê missiòn però 'e jé finide e in atese de sentençe, iò e siôr Mòmolò si ritirîn in cusine (*al va vie e Mòmolò j ten daûr*).

LÚÇIE — (*rirolzin'-si a la Comari*) Ce vorèss-je di-mi? Nò is-e contente ancemò?

COMARI — (*rissolude*) 'O difindarai siôr Tite e il so bon cûr.

LÚÇIE — Bon cûr a dâ vie ciartis di mil.

COMARI — Bon cûr sí, bon cûr.

VENÂNÇIO — (*a Tite*) Coragio la pol voltarse (*Intermezând*)

TITUTE — Al ciacare l'avocat difensôr.

COMARI — Se siôr Tite j ha dat dai bêt a Cándide e se j-nd-há prometûc dai altris nò-l'è stât altri che pa'l so bon cûr. - Lôr lu vevin bandonât, siore Lúçie, e in chêi momènc, l'unich so confuârt, forsît 'e jê stade Cándide. - Ma ca 'e jê la Comari che ciacare, siore Lúçie, 'o soi jo ch' 'o hai ricevudis lis confidençis di chê pûare digraziade.

VENÂNÇIO — La se volta in ben, coragio sior Tita. (*Intermezând*)

TITUTE — Mi ha giavade une piere dal stomi.

COMARI — Come vuèl-ie che dut chest al sedî succedût in quatri mès e mièc? Bisugne comprendi el displasê di un om restât bessòl par cäuse so, quând che iò 'o soi stade a visâ-lu che Cándide 'e doveva tornâ a ciase so. Parcè capisc-ie 'e doveve....

LÚÇIE — Nò j vevî pensât (*sole*) (*Tite e Venânçio a sogèt*)

COMARI — E lui, puar om, savin'-le pròssime a diventâ mari al si è comuvût a tal pont di prometi el so ajût pe' disgraziade. Is-al par chel el pari dal gnûf nassûd?....

LÚÇIE — (*sole*) Cumò 'o capisc (*si sente e 'a sculnt la muse fra lis mans*).

COMARI — (*di colp*) J vuelin nûv mes, siore Lúçie benedete, e je lu sa miôr di me.

TITUTE — (*di colp al si slançie viârs la comari*) Dio la benedisci! e ce avocat difensôr!

(*Lúçie 'e vai e alore Titute, che l'ha abraçade la Comari, al si volte, al ciale Lúçie, e dopo, cun vòs inteneride*).

TITUTE — 'O ti soi simpri stât fedêl fin a lis gnossis d'arint.... e cumò ch' o soi diventât vècio e bon di nuje, tu ti sês permetude di dubità.

LÚÇIE — Tite, Tite cumò o soi iò che ti domandi perdòn (*si butin in-t-al braç da l'altri*)

VENÂNÇIO — (*Intermezând*) Nessun ga mai dubità de lori. Pase, pase (*a Esterine*) Ciamemo pre Nozzente.

(*La Comari ed Esterine, fûr di sè da contenteçe 'e corin a clamà Mò-molo a pre Noçent*).

TITUTE — (*a Lúçie*) Ven ca, Lúçie, sençe testimoniis e busse il to Titute el Podestât di Surisins (*E' restin abraçâc*).

VENÂNÇIO — Li lasso che i se sbrocchi (*al va par sortî e su-la puarte s'intope in duc chêi altris che jentrin cun gionde*).

MÒMOLO — Corpo de l'ua, sior Pievan, el gaveva proprio reson. - Doman lu el benedirà do matrimoni e in breve gavaremo do batesimi.

TITUTE — Cui-sà che nò-l succedi chel sgórbio.... eh Lúçie?

VENÂNÇIO — (*abraçânt Esterine*) Felissi del tuto, felissi del tuto.

SCENE ULTIME

(Mariute jentre con une guantiere di biscotîns, butîlgis e tacis. Tite, Lûcie, Esterine e Venâncio la judin e in curt dut l'è pront par il prindis)

MÔMOLO — *(in-pîns su la ciadree al fâs intindi di volê fevelâ. Duc cu-la tace in man e' spietin).*

Sior Tita, siora Luzia, Venanzio, Esterina
In cesa i giurarà doman matina
De volerse ben, de no rabiarse mai
Così, co i fa i cocheti innamorai.

(Tite a sogèt "Ce blave, ce bábio").

Oggi, che pase la regna in tutti i cori,
Alzemo i calici a si fecondi amori
Sighemo, su Comare, pre Nozzente
L'augurio bel a tanta bona zente.

(l'alçe la tace - duc lu felicitin)

Ancora do parole

Evviva el Podestà de sto paese
Evviva questo público zentil e cortese.

Duc' e alçin lis tacis. Titute al fâs viodi volentîr la fasce di podestât ch'al puarte simpri sot la giachete, forsit par pôre di piârdi-le.

IL SIPARI AL VA JÚ A LA SVELTE e cussi 'e finisc la comédie

2 març 1928 (VI.)

Ságio di comènt di dôs curfis poesiis di Zorùt

Il ciaçadôr

Il dotôr Casimîr
che al maçe tîr par tîr,
îr l'altri, apene dí, su-l so brâv muss
l'è lâd a trai a lødulis cu-l çuss,
cu-la buine intençion chê sere istesse,
di lâ a mangiâ-lis cun chê tâl contesse.
Èco-lo che al fâs zuch 'te-l mièç di un prâd,
e al uite, e al tire i vôi come un spirtâd;
èco-lis come class

che cåpitin jú abáss;
chê piûle, chê grugiule,
cheste ven indenánt, chê altre rincule;
il dotôr al combât fra il nò e il sí,
nò-l sa a quale tignî;
ma al viôd une che bale....
j smire... j smire
e finalmentri j tire,
j tire... e po' la fale,
e al mace invece il çuss: - Cumò soi frit... -
Dit ches al dá un sospîr e al glot il uft.

Un mûd di fâ-si siôr

Si viôd al dí di ué plui di un vilân che lassade la uârzine e il massâng, rutând di ai e miêç crepâd di fan al câpite in citât a purgâ il sangh.

L'unich talar che al-hâ lu met in zîr, e compre e torne a vendi e fâs usuris; l'esperiençe lu rind om di mistîr, e intrigh a lui a ciatâ-j lis comissuris.

Fat in pôch timp un rich negoçiânt, l'ha costûms ilibâç, dite d'onôr... ma al falisc... lu ha tradît qualchi birbânt... e cun chest truch lu viodis dopli siôr.

Lis poesiis scieltis par comentâ, come sâgio, son des plui curtis e forsi des manco rilevânc, ma in Zorût simpri si mantèn corispondent il spirit di comicitât, chel di osservaçion e il sintimènt cussî come il lengâç e la frase ch' a è dal dut carateristiche e furlane.

In vinc viârs e dai plui curç, setenaris cun endecaslabos, che tant ben 'a si adatin a la spontaneitât dal racònt, si riassúm une còmiche storiele che 'a sta perfetamentri 'te-i limiç dal vèr: Un ciaçadôr, che al vûl dâ-si des áriis, al partîsc cu-l so çuss par trai a lis ôdulis e al pense za di lâ a mangiâ-lis lá di une tâl contesse, rindin'-si cussî acèt pe' so braure da la rispetabil galânt.

Èco-lo dúncie 'te-l prâd, dut preocupât e atènt cu-l voli; eco lis ôdulis che ben prest a' plombin a-bâss: Chê 'a ven indenánt, chê 'a rincule... il dotôr Casimîr in viste di tante cucagne nò-l sa a quale tigni e al combât fra il nò e il sí; al viôd une che bale... j smire... e finalmentri j tire. Come ch' a è ben esprime l'impaciènçe e il contènt dal

ciaçadôr e cussî per la situaçion del tir e il presentâ-si des ôdulis.

E dut chest cun quatri perâulis tant justis ed apropiadis: *J tire e po' la fale, e al maçe invece il çuss... Cumò soi frit....* Ma une disgrâcie 'a clame l'altre: *Dit chest al dá un sospîr e al glot il uît.* Comicitât radoplade in ultim come une fusete di gran efiet. Notâ la spontaneitât de l'espressiòn, la concisiòn e la rime che ven naturâl e juste fasint risaltâ i concèç plui interessânc. Umorismo e critiche a certis pretesis, spirt di osservaçion e anâlisi psicològiche de maciete. Insome si rîd, si osserve, si impare e sore-dût si ciate motiv di apreçâ l'art, il zûch riuscît de rime cussî espressive.

Un mûd di fâ-si siôr

Culî Zorût al presente un quadri carateristich dal vilân rafât. La uârzine e il massâng lu piturin subit. Ricuardi che une volte dug i contadîns a' puartavin daûr il cûl un rimpín di fiêr sei par picia il codâr che il massâng che jere l'arme che ben spess e' puartavin daûr cun sè.

Rivât in çitât sençe scrúpui al met in zîr qualchi talar e cu-l'astúcie e cu-l'usure al devente un rich negoçiânt. Alore al ciape l'árie di persone fine di custûms civii; la so dite vûl 'quistâ-si onôr ma sôl par sfrutâ la situaçion. Ançi par parâ il colp dei siei pasâç imbrois al si fâs viodi vítime: ... qualchi birbânt a' lu imbroe. E cun chesg truchs al radople la reputaçion press i ingènuos e al fâs fortune dople.

Sátire picánt par tang che si podin paragonâ a chest.

CICI